

**Ufficio Stampa della Provincia autonoma di Trento**

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

**COMUNICATO n. 2648 del 01/09/2022**

**Traduzione in ladino**

## **Dì de l'Autonomia: la mostra “La Provincia si racconta” la “A” e i ciastie enlumené**

**En lunesc ai 5 de setember del 2022 l é la Dì de l'Autonomia, te chesta data storica del 1946 l é stat sotscriit la cordanza De Gasperi-Gruber. Na dì spezièla, con n program rich de scomenzadives, che tegn cont ence di cincant'egn del Secont Statut de Autonomia che sozede chest'an. La dì la scomenzarà co la inaudazion, da les 11 ló da la Sala Depero tel palaz de la Provinzia autonoma de Trent te piazza Dante, de la mostra permanente “La Provincia si racconta. Un viaggio tra storia, presente e futuro dell'autonomia trentina”, endrezèda e metuda a jir da la Fondazione Museo storich del Trentin. Apede la mostra, dai 5 de stember ensin ai 31 de dezember del 2022, per fèr festa per i cincanta egn del Statut l é stat projetà instalazions temporanes a forma de “A”, che stèsc apontin per autonomia. Ai 5 de setember, per chesta ocajon, l Ciastel del Buonconsiglio l vegnarà orì a la jent con entrèda debant. L event piú gran de la dì sarà la zerimonia tel Teater Sozièl col concert del coro de la Sat.**

### **La mostra**

Chest an l é l cincanteisem cedeand del secont Statut de Autonomia e la mostra permanente “La Provincia si racconta”, endrezèda da la Fondazione Museo Storich del Trentin, à desche obietif “contèr” la storia, l didanché e l davegnir de la istituzion de la Provinzia autonoma de Trent. L percors, spartì anter desferentes postazions e instalazions, l tol ite l prum partiment de la senta de Piazza Dante, da la entrèda prinzipèla ensin al portech Winkler.

“La Provinzia si racconta”, projet avert e che cresc man a man, met dant con sia instalazions n muion de contegnui e lengac, e les ge dèsc l met al vijitador de passèr fora 50 egn de storia de l'autonomia de gra al svilup de la competenzes toutes su col Secont Statut del 1972.

L percors, l porta dant na recostruzion cronologica di desferenc vèsch che à caraterisà chest mez secol de storia, estra che na lingia de grafics che deida a entener miec la crescimonia del sistem provinzièl. Element zentrèl de la mostra e de la “prejentazion” l é la testimonianzes de la femenes e di omegn che laora e che à lurà per la Provinzia, estra che di desferenc enc e setores che met adum l sistem. Vegn coscita metù dant n mosaich de stories personèles che se encroja co la storia piú generèla de la istituzion, da olache l é possibol trèr fora l sens de partegnuda, l spirit de servije e la situazions che i l' à mudèda. Endrezèda desche n profil Instagram, patstories l podarà esser vardà ence tras chest social network. Tinultima, na dopia postazion la é dedichèda a la Sala Depero.

Se podarà veder chest percors dal lunesc al vender da les 9 da doman ensin mesdì e da la does a les 5 domesdì. L'area educativa de la Fondazione Museo storich del Trentin la porta dant vijites compagnèdes con prenotazion fata dantfora.

### **La instalazions**

Apede la mostra, dai 5 de setember ensin ai 31 de dezember del 2022, per fèr festa per i cincanta egn del Statut l é stat projetà instalazions temporanes a forma de “A”, che stèsc per autonomia, che les vegnarà metudes ló da la entrèda prinzipèla de la Provinzia e de la Region te piazza Dante, outra les vegnarà metudes te strèda Mancì, ló da la Presidenza del Consei Provinzièl, e te strèda Torre Verde, ló dal Consei de la Autonomies Locales.

Dal 1m de setember inant vegnarà enlumenà de color porpora i ciastie Thun, Stenico e Beseno e la loja veneziana del Ciastel del Buonconsiglio, che en lunesc ai 5 de setember, per chesta ocajion, la vegnarà orida debant per i vijitadores.

## **Grafica te l'enjonta**

### **Traduzion di Servijes Linguistics e Culturèi del Comun general de Fascia**

(Traduzione a cura dei Servizi Linguistici e culturali del Comun general de Fascia)

(cdt)